

## **Pɔɔlo ɔwole ɔbono ɔ Nmarase Bunge Efiso Awura Mɔ**

<sup>1</sup> Me Pɔɔlo ɔbono n gye Kirisito Yesu ɔsɔɔ kyu naa de Wurubuaare gelaare so mɔ ne n kya nmarase ɔwole baare. N kya nmarase mi-i sa feye abono Wurubuaare gi lɔrɔ feye yela sa mɔ-nyoro ne fe de Kirisito Yesu gesara dɔ Efiso ɔsowole so mɔ.

<sup>2</sup> Aye-se Wurubuaare de aye-Wura Yesu Kirisito me' sa feye so gewɔnsa dense de me' sa feye gisen yuuli.

*Wurubuaare Gi Kyu Oduduu Dɔ Ayuule Kamaase Kyu Sa Aye*

<sup>3</sup> Ayenbi a gye Wurubuaare-leɛ. Mɔ ne n gye aye-Wura Yesu Kirisito mɔ-se! Aye-re Kirisito ginyamese kolon so mɔ, Wurubuaare gi yuule aye. O kyu oduduu dɔ ayuule kamaase abono a bo Wurubuaare dɔ mɔ kyu yuule aye Kirisito asonbo mɔ.

<sup>4</sup> I kya nyiile yee pei de Wurubuaare ɔ' lee soso de gese mɔ, kyu naa de aye-re Kirisito ginyamese kolon so mɔ, ɔ lee gibaa yii aye yee a' wɔra gisen fufuli awura abono ɔ lɔrɔ aye yela sa mɔ-nyoro. Gelaare' gebono Wurubuaare bo sa aye so mɔ,

<sup>5</sup> ɔ wolaa tɔge yela yee kyu naa de Yesu Kirisito so ne ɔ laa yeege a' wɔra mɔ-biana gesintin. I bo Wurubuaare ɔbole ne i wolaa i bo mɔ-gewɔnsa dɔ yee a' wɔra mɔ-biana.

<sup>6</sup> Wurubuaare gɛwɔnsa dɛnsɛ gɛbono ɔ kya sa aye so genen mɔ gɛ kya kyu nyisigiye beɛ bara mɔ. I kya yege asa mɛ' yen mɔ. Aye-rɛ Yesu, Wurubuaare mɔ-bi laarese mɔ, a wɔra nyamese kolon so ne i yege Wurubuaare gi bugi mɔ-gisen wɔra ilaa ide pɛwu sa aye genen.

<sup>7</sup> Aye-rɛ Yesu ginyamese kolon mɔ so mɔ, a nye aye-nyoro lii ilaa nyenyɛn giwɔra dɔ ne a san a tɛ sa Wurubuaare. Kyu lii Yesu asunbi lɛwu ɔbono o wu' kyeege mɔ-nkalan fue sa aye mɔ so ne Wurubuaare gi mɔlegɛ aye genen. Mɔ-gɛwɔnsa dɛnsɛ gɛbono ɔ sa aye so mɔ, o kyu aye-ilaa nyenyɛn ibono a wɔra mɔ kyu kyee aye, yege nkana aɲ kaabore ɔ' wɔra genen sa aye ba-a pi-i.

<sup>8</sup> Wurubuaare gi tansi bugi mɔ-gisen sa aye. ɔ tansi o nyi ɔlaako ne ɔ kya bii wɔra ilaa ɔkpa kamaase so.

<sup>9</sup> ɔ wolaa o nyi yeɛ ɔ laa wɔra ilaa beɛ naa de Kirisito so. I wolaa i bo mɔ-gɛwɔnsa dɔ genen, ne o kyu imɔ ɲara. Ide kon ɔ san lɛɛ imɔ-gewi nyiile aye.

<sup>10</sup> Owi mɔ gi fo mɔ, ɔ laa yege mɔ-gɛwɔnsa gɛbono gɛ' ba gɛsintin. ɔ laa yege ilaa ibono ɔ lɛɛ soso de gɛse mɔ pɛwu i laa kyena genɔ kolon de i' bara imɔ-nyoro gɛse sa Kirisito.

<sup>11</sup> Kyu lii aye-rɛ Kirisito ginyamese kolon so mɔ, Wurubuaare gi tɔɔse aye lɛɛ yeɛ a' son mɔ. ɔ wolaa tɔge yela yeɛ i laa ba genen. In gyɛ imɔ wolɛ ne Wurubuaare gi tɔge yela. Ilaa kamaase ibono i kya ba mɔ, ɔ kya yege i' ba daa genɔɔbono i laa nye kyena de mɔ-gɛwɔnsa gɛbono ɔ wolaa ɔ de mɔ.

<sup>12</sup> Aye Gyuda awura ne n gye asa abono a daa gikyu aye-ansi gyan Kirisito so yee mo ne nan molege aye. O wolaa lee gibaa yii aye yee naa de aye so mo, asa me laa wu mo-nyisigi de me' yen mo.

<sup>13</sup> Feye abono fe men gye Gyuda awura ne fe men wolaa bii Wurubuaare onon mo, feye kee fe nye nu gesintin agyebi mo. Genen gesintin agyebi mo ne n gye okalan konkonse obono fe nu ne fe nye Wurubuaare ase gekyena onan faa. Feye-re Kirisito ginyamese kolon mo so mo, owi obono fe so okalan mo gyi mo, Wurubuaare gi kyu mo-Oduduu mo wora feye do fee genobono o wolaa ka yela mo ne i wora fee o daase feye.

<sup>14</sup> Ibono o kyu mo-Oduduu mo sa aye mo, i kya nyiile aye yee o laa sa aye ilaa dense ibono pewu o toge yela yee o laa sa mo-biana gbaa-gbaa mo. Aye-re Wurubuaare Oduduu mo a laa kyena kaabore Wurubuaare o' baa lee aye lii ilaa nyenyen kamaase do de a' san kyena sa mo Wurubuaare wole. Imo ide pewu i laa yege asa me' wu Wurubuaare nyisigi de me' yen mo.

### *Pɔɔlo Gi Dalaa Sa Yesu Asonbo Abono Me Bo Efiso Mo*

<sup>15</sup> Ne nu feye Efiso awura so yee fe kya ka gyan aye-Wura Yesu so. Ne ne nu kee yee fe kya laare asa abono pewu Wurubuaare gi loro omo yela sa mo-nyoro mo ilaa. Imoso

<sup>16</sup> men kya taa Wurubuaare afaala yege. N kpe n kya nyingi feye so me-ndalaa do.

<sup>17</sup> Aye-Wura Yesu Kirisito mo-se Wurubuaare gye Nyisigi Gemu. N kya dalaa yee o' sa feye

olaako ginyi de ɔ' lɛɛ mɔ-ilaa gɛwi nyiile fɛye de fɛ' bii mɔ-gidebi.

<sup>18</sup> Wurubuaare ɔ' bugi fɛye-ansi de ɔ' yɛgɛ fɛ' bii ilaa ibono so ɔ tɔgɛ fɛye yɛɛ fɛ' kyu fɛye-nyoro sa mɔ mɔ de fɛ' kyu fɛye-ansi gyan imɔ so. Imɔ ne n gyɛ mɔ-nyisigyɛ ilaa gbaa'gbaa ibono ɔ kya kyu sa abono ɔ lɔrɔ yela sa mɔ-nyoro mɔ.

<sup>19</sup> Aye pɛwu abono a kya ka gyan Yesu so mɔ, Wurubuaare kya kyu mɔ-ɔlon beɛ ɔbono ɔŋ bo ɔkara mɔ wɔra gɛsun aye-asen dɔ. N kya dalaa yɛɛ Wurubuaare ɔ' yɛgɛ fɛ' bii genen ɔlon ɔbono. ɔlon ɔbono kee ne

<sup>20</sup> ɔ kyu kyingi Kirisito lii ibuni dɔ mɔ. Genen ɔlon mɔ kee gi puru Kirisito kpe soso kpaa sa mɔ ɔkyenaten Wurubuaare gibaa gyise so, mɔ-rɛ mɔ mɛ san mɛ kya gyi gɛwura.

<sup>21</sup> Kirisito gi don ilaa sense pɛwu gbaa bun, fɛɛ awura, abelɛnsɛ, ɔlon kamaasɛ, de ilaa ibonoana pɛwu i kya nyɛ ɔlon anyamesɛ so mɔ. Ilaa kamaasɛ ibono asa mɛ kya saawo tere yɛɛ i' kpaa ɔmɔ mɔ, Kirisito ne n don imɔ pɛwu. In gyɛ aye-gɛsinkpan so gɛkyena gɛdɛ dɔ wolɛ; gɛkyena gɛbono gɛ laa baa ba gɛkaako mɔ dɔ kee.

<sup>22</sup> Wurubuaare gi yɛgɛ ilaa kamaasɛ i kya ŋmii daa Kirisito. Ne ɔ yɛgɛ Kirisito gi gyangbara ilaa kamaasɛ dɔ sa mɔ-asonbo gikpen mɔ.

<sup>23</sup> Kirisito asonbo gikpen mɔ gi dɛ fɛɛ mɔ-nyoro. Mɔ Kirisito ɔbono ɔ bo ilaa kamaasɛ dɔ mɔ, ɔ bo mɔ-asonbo gikpen mɔ dɔ ɔkpa kamaasɛ so.

## 2

*A Wɔra Fɛɛ Abono Mɛ Kyingi Lii Ibuni Dɔ Mɔ*

<sup>1</sup> Pɛi de fɛ baa buu Kirisito mɔ, fɛ wɔra fɛɛ asa abono mɛ wu' mɛ naa mɔ. I lii fɛɛ genen owi ɔbono mɔ, ilaa nyenyɛn de gisomaanu

<sup>2</sup> ɔkpa ne fɛ buu. Fɛ nu daa de gɛsinkpan so gɛkyena dɔ ilaa. Ilaa nyenyɛn pɛwu gɛmu mɔ ɔkpa ne fɛ buu. Mɔ ne n gyangbara ɔ sa ilaa nyenyɛn oduduu kpɛi-kpɛi ibono i bo afuu so mɔ. Mɔ-oduduu ne n kya wɔra gɛsun gisomaanu awura dɔ.

<sup>3</sup> Nkana aye pɛwu a bo genen gisomaanu asa abono dɔ. Anyamesɛ ɔbolɛ gɛlaarɛ ilaa i gyi aye-amu. Ilaa ibono i bo aye ɔkon aye-nyoro dɔ de aye-nwɔnsa dɔ mɔ wolɛ ne a kpɛ a kya wɔra abɛrɛ abono dɔ. Imɔso Wurubuaarɛ gi kyu ginyadon de aye. Genen kee ne nkana Wurubuaarɛ dɛ anyamesɛ pɛwu ginyadon.

<sup>4</sup> Wurubuaarɛ bɛrɛ, ɔ tansi ɔ gye otolonbo. Lii gɛlaarɛ' bɛlɛ gɛbono ɔ bo sa anyamesɛ so mɔ,

<sup>5</sup> ɔ sa aye mɔ asɛ gɛkyena ɔnan. Aye-ilaa nyenyɛn i dabɔlɛ nyida aye ne a wɔra fɛɛ asa abono mɛ wu' mɔ, ɔ lɔrɔ aye, ne a san wɔra fɛɛ abono mɛ kyingi lii ibuni dɔ mɔ. I dɛ daa fɛɛ aye-rɛ Kirisito ne n wu' kyingi dabɔlɛ. Fɛ nyɛ Wurubuaarɛ amɔlɛgɛ faa mɔ, mɔ-gitolon de mɔ-gidɛnsɛ so ne fɛ nyɛ amɔ genen.

<sup>6</sup> Gɛnɔɔbono i wɔra fɛɛ a wu' kyingi mɔ, genen kee ne aye-rɛ Kirisito Yesu ginyamesɛ kolon mɔ so mɔ, i wɔra fɛɛ Wurubuaarɛ gi diirɛ aye kpɛ soso dabɔlɛ de Kirisito ne ɔ sa aye ɔkyenaten mɔ asɛ, ne i san wɔra fɛɛ a bo daa Wurubuaarɛ dɔ.

<sup>7</sup> Wurubuaarɛ gitolon bɛlɛ giɲ bo ɔkara. ɔ kya laarɛ ɔ' lɛɛ mɔ-gitolon gide nyiile asa lii nperɛ kyu i kya kpɛ. Imɔso ne ɔ yɛgɛ i wɔra fɛɛ ɔ kosorɛ

aye dabɔle de Kirisito mɔ. Ɔ kya laare asa me' wu gelaare' gebono ɔ kya laare aye-ilaa kyu lii aye-re Kirisito Yesu ginyamese kolon mɔ so mɔ.

<sup>8</sup> Wurubuaare gitolon so ne ɔ mɔlegɛ fɛye de fe' nye mɔ ase gekyena kyu naa de fɛye-gikagyan gibono fe kya ka gyan Kirisito so mɔ. I men lii fɛye-laawɔra so. I gye daa ilaa kyɛɛɛ ibono Wurubuaare gi kyu kyɛɛ fɛye,

<sup>9</sup> de i men sa i' ba yɛɛ ɔko o' nyiile mɔ-nyoro yɛɛ mɔ-ilaa dense giwɔra so ne ɔ nye ɔkyenaten Wurubuaare ase.

<sup>10</sup> I lii fɛɛ aye Kirisito asonbo mɔ, a gye daa Wurubuaare ilaa wɔrase pobɔɔ. O kyu adawo kii lɔɔ pɔɔ aye kyu naa de aye-re Kirisito Yesu ginyamese kolon mɔ so. Wurubuaare gi lɔɔ pɔɔ aye de a' nye wɔra ilaa dense ibono i wolaa i bo mɔ-gewɔnsa dɔ ne ɔ baala yela sa aye de a' nye wɔra imɔ mɔ.

### *A Bingiri Nyamese Kolon Kyu Naa De Kirisito Lewu So*

<sup>11</sup> Fe' nyingi yɛɛ fɛye abono me korogɛ fɛye ne feŋ gye Gyuda awura mɔ, feŋ wolaa bii Wurubuaare ɔson. Imɔso Gyuda awura mɔ me yela fɛye ginyen yɛɛ awɔre amaatenbo. Ne me kya tɔge yɛɛ mɔmɔ bere, me gye daa awɔre atenbo abono me kya gyi Wurubuaare nbara so. Yege mɔmɔ-awɔre giten mɔ gi gye daa ansi so ilaa ibono anyamese me kya kyu wɔra mɔmɔ-gɛyuwɔle so mɔ giyan. Aye-re fɛye abono a kya son Yesu mɔ bere, gisen dɔ ilaa ne n tiri aye.

<sup>12</sup> Fe' laa ansi kere gikyenabi gibono fe kyena baa kyon mɔ. Genen aberɛ abono mɔ, feŋ ti bii

Kirisito, ne fɛye-rɛ Isirale awura abono mɛ kya son Wurubuaarɛ mɔ fɛɲ bo sɛi giwɔra. Gɛnɔ gɛbono nkana Wurubuaarɛ gɛ yɛgɛ mɔ-rɛ Isirale awura mɛ wɔra de mɔmɔ-rɛ mɔ mɛ' kyu kyena de abara mɔ, nkana gɛ gyɛ fɛye gisafo. Aberɛ abono mɔ, fɛ naa gɛsinkpan so mɔ, fɛye-ansi a mɛɲ gyan Wurubuaarɛ so yɛɛ mɔ ne n dɛ fɛye ɔ naa.

<sup>13</sup> Nkana fɛye-rɛ Wurubuaarɛ nsana i wɔra gɛta. Idɛ kon berɛ, fɛye-rɛ Kirisito Yesu ginyamesɛ kolon so mɔ, Wurubuaarɛ gi bugi ansi de fɛye kyu naa de Kirisito nkalan nbono ɔ kyɛɛgɛ fue sa aye mɔ so.

<sup>14</sup> Kirisito ne n bara aye gisen yuuli. Aye Gyuda awura de fɛye asɛnsɛ abono fɛɲ wolaa bii Wurubuaarɛ ɔson mɔ, Kirisito ne n yɛgɛ ne aye-rɛ fɛye a baa wɔra nyamesɛ kolon. Ɔ boori gɛkyo ɔpɔɔrɛ ɔbono nkana ɔ bo aye-rɛ fɛye nsana mɔ bun.

<sup>15</sup> Nkana aye Gyuda awura nbara bolonsɛ de aye-ilaa kyosɛ mɔ i baragɛ aye-rɛ fɛye nsana. Genen nbara de ilaa kyosɛ ibono so ne Kirisito gi kyu mɔ-nkpa fue de ɔ' nyɛ lɛɛ giyaa kyise imɔ. Ɔ lɛɛ giyaa kyise imɔ de ɔ' kyu aye anyamesɛ gikpen ginyɔ mɔ kyu dabɔlɛ wɔra nyamesɛ kolon. O kyu aye dabɔlɛ genen daa kyu naa de aye-rɛ mɔ-ginyamesɛ kolon mɔ so. Imɔso lii Kirisito so mɔ aye pɛwu a nyɛ gisen yuuli.

<sup>16</sup> Kirisito kya laarɛ ɔ' lɔrɔ aye-anyamesɛ gikpen ginyɔ pɛwu aye-rɛ Wurubuaarɛ nsana. Ɔ lɔrɔ aye gikpen ginyɔ ne a wɔra nyamesɛ kolon kyu naa de mɔ-lɛwu ɔbono o wu' lɛwu oyii mɔ so mɔ. Nfono ne Kirisito gi yela aye-rɛ fɛye gɛkyo

mɔ ɔkara.

<sup>17</sup> Kirisito gi baa tɔgɛ Wurubuaarɛ gisen yuuli ilaa sa aye Gyuda awura abono a dɛ Wurubuaarɛ ɔson mɔ dɔ mɔ. Ne ɔ yɛgɛ fɛye abono nkana Wurubuaarɛ ɔson mɔ gyɛ fɛye gisafo mɔ kee fɛ nu genen gisen yuuli gibono ilaa.

<sup>18</sup> I lii fɛɛ Kirisito so mɔ, aye anyamesɛ gikpen ginyɔ gidɛ a kya nyɛ ɔkpa bugi aye-gisen sa aye-sɛ Wurubuaarɛ kyu naa de mɔ-Oduduu kolon mɔ so.

*Wurubuaarɛ Adɛ Mɛ Dɛ Fɛɛ Obu. Kirisito Ne N Gyɛ Gɛɛ ɔpɔɔrɛ*

<sup>19</sup> Imɔso fɛye abono fɛ mɛɲ gyɛ Gyuda awura mɔ, fɛɲ baa fɛ gyɛ asafo Wurubuaarɛ ɔson dɔ. Fɛɲ baa wɔra fɛɛ abono mɛ tɛ ako gesinkpan so. Fɛ bingiri nten abi. Fɛ bo asa abono Wurubuaarɛ gi lɔrɔ ɔmɔ yela sa mɔ-nyoro mɔ dɔ. Wurubuaarɛ gɛten dɔ adɛ ne fɛ gyɛ.

<sup>20</sup> Fɛye-rɛ Wurubuaarɛ gɛten dɔ adɛ mɔ pɛwu fɛ dɛ fɛɛ obu. Yesu isɔɔ mɔ de Wurubuaarɛ ikalan atɔgɛbo mɔ, mɔ, mɛ dɛ fɛɛ abui abono a gyan genen obu mɔ gɛɛ ɔpɔɔrɛ mɔ so. Ne Kirisito Yesu gbaa-gbaa ne n gyɛ obu mɔ gɛɛ ɔpɔɔrɛ.

<sup>21</sup> Yesu ne n dɛ obu mɔ pɛwu ne obu mɔ gi kyaga gikolon ɔ yelɛ ɔ kpɛ ɔ kya lɔnga ɔ kya too. Genen obu baarɛ laa baa wɔra Wurubuaarɛ gbaa-gbaa lɛɛ ɔson obu kyu naa de Wura Yesu so.

<sup>22</sup> Lii fɛye-rɛ Yesu ginyamesɛ kolon mɔ so mɔ fɛye kee fɛ dɛ fɛɛ Wurubuaarɛ obu baarɛ asodoo mɔ ako. ɔ dɛ fɛye ɔ kya pɔrɔ obu ɔbono de ɔ' kyena mɔ dɔ kyu naa de mɔ-Oduduu mɔ so.



### 3

#### *Wurubuaare Gi Sun Me Feye Abono Fɛɲ Wolaa Bii Mɔ Mɔ Ase*

<sup>1</sup> Imɔ idɛ so mɔ, feye abono fɛɲ wolaa bii Wurubuaare agyɛbi mɔ, feye-ɔdan giwɔra so ne me, Pɔɔlo n dɛ Kirisito Yesu ɔkalan mɔ n naa. Genen so ne Yesu akyobo mɛ keda me tii de obu faa.

<sup>2</sup> Nɛ sɔɔ gyi yɛɛ fɛ ti nu yɛɛ Wurubuaare gi kyu mɔ-gɛsun gɛdɛ wɔra me-abaa dɔ de fɛ' nyɛ mɔ-amɔlɛgɛ naa de me so.

<sup>3</sup> Wurubuaare gi lɛɛ mɔ-ilaa boduduuse kyu lii Kirisito so nyiile me, fɛɛ mɔ gbaa-gbaa ne n tɔngɛ de me. (Nɛ ti tɔgɛ imɔ so ilaa ɲmaraa me-ɔwɔlɛ baare dɔ.)

<sup>4</sup> Imɔso fɛ kalɛ ɔwɔlɛ mɔ mɔ, fɛ laa wu yɛɛ nɛ nu Kirisito ilaa boduduuse mɔ gɛsɛ.

<sup>5</sup> Anyamesɛ abono mɛ daa gikyena gɛsinkpan so yɛgɛ mɔ, mɛ mɛɲ nyɛ de Wurubuaare ɔ' lɛɛ Kirisito ilaa boduduuse idɛ nyiile ɔmɔ. Idɛ kon ne Wurubuaare Oduduu mɔ gi lɛɛ imɔ-gewi nyiile mɔ-ikalan atɔgɛbo de aye Yesu isɔɔ mɔ. Aye ne ɔ lɔɔ yela sa mɔ-gɛsun mɔ.

<sup>6</sup> Genen Kirisito ilaa boduduuse ibono o nyiile aye mɔ ne n gye yɛɛ: kyu naa de Kirisito Yesu ɔkalan konkɔnsɛ mɔ so mɔ, feye abono fɛɲ wolaa bii Wurubuaare ɔson mɔ de aye Gyuda awura mɔ pɛwu a wɔra nyamesɛ kolon. Imɔso aye-rɛ feye pɛwu a laa nyɛ ilaa ibono Wurubuaare gi ka yela yɛɛ ɔ laa sa abono mɛ gye mɔ-biana mɔ. Aye pɛwu a kya nyɛ ilaa ibono Wurubuaare gi wolaa ka yela kyu naa de Kirisito Yesu so mɔ.

<sup>7</sup> Genen okalan konkonse baare gesun ne n baa wɔra me-gesun wɔrase. Wurubuaare gidense de mɔ-gelaare' so ne ɔ sa me ɔlon yeɛ n' nye wɔra mɔ-gesun ɔwɔrabo.

<sup>8</sup> Aye abono pɛwu Wurubuaare gi lɔrɔ yela sa mɔ-nyoro mɔ, nkana me ne menj fo sei. Me ɔde mɔ ne Wurubuaare gi wu yeɛ ɔ laa kpaa de n' wɔra gesun bele gedɛ. Gesun mɔ ilaa i gye daa Kirisito Oduduu dɔ lɛɛ awurato ilaa ibono nyamesɛ manj taale bii kpaa logɛ. Ilaa gbaa' ide ne Wurubuaare gi yege n naa mi-i tɔge mi-i sa asa abono mɛ menj wolaa bii mɔ-ɔson mɔ.

<sup>9</sup> Wurubuaare yeɛ n' yege de anyamesɛ pɛwu mɛ' bii ɔkpa ɔbono so mɛ laa nye genen ilaa gbaa' ibono mɔ. Wurubuaare gewɔnsa gedɛ ge gye ilaa boduduuse. Nkana lii ko-o gese de gese mɔ, soso de gese ɔlɛɛbo mɔ gi kyu mɔ-gewɔnsa gedɛ kyu sii de mɔ-nyoro.

<sup>10</sup> Ide kon berɛ, ɔ kya laare mɔ-ɔlaako ginyi bele gi' lii gewi. Kyu naa de aye Yesu asonbo gikpen mɔ so ne ɔ kya yege Wurubuaare dɔ isɔɔ de ilaa kamaase ibono i kya nye ɔlon anyamesɛ so mɔ mɛ' bii genen ɔlaako ginyi mɔ.

<sup>11</sup> Wurubuaare gi san lɛɛ mɔ-ɔlaako ginyi gewi genen mɔ, i kyena de mɔ-gewɔnsa gebono ɔ wolaa sa yela lii ko-o gese de gese mɔ. Ide kon ne ɔ yege ne i ba gesintin kyu naa de aye-Wura Kirisito Yesu so.

<sup>12</sup> Lii aye-rɛ Yesu ginyamesɛ kolon mɔ so mɔ, a nye ɔkpa de a' bugi aye-asen pɛwu sa Wurubuaare de a' ka gyan mɔ so. A nyi yeɛ a bo ɔkpa genen kyu naa de gisɔɔgyi gibono a bo sa Yesu mɔ so.

<sup>13</sup> Imoŋo n kya kole feye, fe meŋ sa fe' yege i' yoŋ feye-nyoro yeŋ n tii de obu n kya wu oŋaawuse feye so. Me-oŋaawuse baare gye daa nyisigyi sa feye.

*Pɔɔlo Kya Dalaa ɔ Sa Abono Me Kya Kale  
ɔwole Baare Mo*

<sup>14</sup> N kya nyingi ilaa ibono aye-se Wurubuaare gi wɔra sa aye anyamese mo, n kya nmii yen mo.

<sup>15</sup> Mo so ne a kya nye tere Wurubuaare do asa de gesinkpan so-lee asa pewu yeŋ gesu kolon do asa faa.

<sup>16</sup> N kya kole Wurubuaare yeŋ genooŋono mo-nyisigyi mo tansi o kyoo mo, o' yege fe' nye olon bele feye-asen do genen kee. O' yege mo-Oduduu mo o' kyena feye-asen do, fe kpe fe kya nye olon kyu naa de mo so.

<sup>17</sup> De feye-gikagyan gibono fe ka gyan Kirisito so mo gi' yege o' kyena feye-asen do. N kya dalaa yeŋ fe' kyu gelaare' kyu wɔra ilaa kamaase, de fe' wɔra feŋ oyii oŋono mo-ilin i loo geŋe-geŋe ne o yeŋe girin mo.

<sup>18-19</sup> N kya dalaa yeŋ fe' keda feye-gelaare' do genen de fe' nye bii genooŋono Kirisito tansi o kya laare feye-ilaa mo. N kya dalaa kee yeŋ feye-re abono pewu Wurubuaare gi loŋo yela sa mo-nyoro mo fe' bii genooŋono Kirisito gesalaare ge nmangɛ, ge lɔnga, ge bo gisoro, ge bo kin, ne nyamese man taale bii gemoo-okara mo. Wurubuaare o' yege mo-gidebi pewu gi' baa wɔra feye-lee.

<sup>20</sup> Aye-Wurubuaare baare kya kyu mo-olon bele kyu wɔra gesun aye Yesu asonbo mo do.

Genen olon obono o bo mo so mo, in bo sen sa mo yee o' wora ilaa sa aye de i' tansi don ibono a kya kole mo abee a kya sa imo gewonsa mo gbaa.

<sup>21</sup> Kirisito Yesu mo-re mo-asonbo gikpen mo me' kpe me kya kyu nyisigyi me kya sa Wurubuaare aye-abere abono a te faa de abere abono a laa baa ba mo kyu i kya kpe gekpaa-gekpa. I' ba genen.

## 4

### *Aye Yesu Asonbo A Gye Nyamese Kolon*

<sup>1</sup> Imoso me Poo lo obono n kya son Wura Yesu ne mo-akyobo me keda me tii de obu faa, n kya kole feye: Wurubuaare gbaa-gbaa ne n toge feye yee fe' kyu feye-nyoro kyu sa mo. Imoso fe' kyena akyenabi abono a kaabore genen mo.

<sup>2</sup> Fe' bara feye-nyoro gese kyu buubuu sa abara okpa kamaase so. Fe' nye gisen de fe' kyu gesalaare toge kyule abara.

<sup>3</sup> Fe kya ka gyan Yesu so faa mo, fe bo geno kolon kyu naa de Wurubuaare Oduduu mo so ne. Fe' peere ansi keda gemo do. Gisen yuuli ne nan yee ne fe laa taale keda feye-geno kolon gebono do.

<sup>4</sup> Aye abono pewu a kya ka gyan Yesu so mo a gye gikolon fee nyamese nyoro gibi. Wurubuaare Oduduu kolon ne n bo no sa aye. Ne Wurubuaare gi toge aye pewu yee a' kyu aye-ansi gyan daa ilaa kolon so. Genen ilaa kolon ibono so ne Wurubuaare gi toge nyamese yee o' kyena sa mo.

<sup>5</sup> A bo wura kolon. Mo ne n gye Yesu. Okalan kolon ne a soo gyi, ne Wurubuaare sagyere kolon ne me gyere aye.

<sup>6</sup> Wurubuaare kolon ne a bo. Aye pɛwu aye-sɛ ne. Mɔ ne n bo aye pɛwu. Ɔ kya wɔra ilaa kyu naa de aye abono a gyɛ mɔ-asonbo mɔ pɛwu so, ne ɔ tɛ aye pɛwu asen dɔ.

*Wurubuaare Gi Sa Aye Nsun Kpei-Kpei De A' Nye Lɔɔ Abara*

<sup>7</sup> Aye abono a kya son Kirisito mɔ a dabɔle a gyɛ gikolon genen gbaa faa mɔ, Wurubuaare gi kyɛɛ aye ɔkamaase mɔ-rɛ mɔ-lɛɛ genɔɔbono ɔkara Kirisito gi kaala sa aye mɔ.

<sup>8</sup> Ilaa kyɛɛɛ idɛ ilaa i wolaa i bo Wurubuaare agyɛbi dɔ yɛɛ,

“Owi ɔbono ɔ dii kpe soso mɔ,  
     ɔ keda Wurubuaare akyobo gikpen belɛ tii,  
     ne ɔ kyɛɛ mɔ-adɛ ilaa.”

<sup>9</sup> Mɛ tɔgɛ yɛɛ ɔko gi dii kpe soso genen mɔ, i kya nyiile yɛɛ genen kaase ɔbono gi wolaa kpelegɛ ba gɛsinkpan gɛɛ gɛɛ kee ne.

<sup>10</sup> Kirisito ɔbono ɔ kpelegɛ lii Wurubuaare dɔ ba mɔ kee ne n kii dii kpe ko-o Wurubuaare dɔ genen. Ɔ wɔra genen daa de ɔ' nye loo ilaa kamaase dɔ gɛten kamaase.

<sup>11</sup> Mɔ-ila a kyɛɛɛ ibono ɔ sa mɔ-asonbo mɔ ne n gyɛ nsun kpei-kpei. Ɔ sa ako yɛɛ mɛ' wɔra mɔ-isoɔ. Ako mɔ mɛ' wɔra mɔ-ikalan atɔgɛbo. Ako mɛ kya tɔgɛ Kirisito ɔkalan konkɔnsɛ mɔ sa asa. De ako, mɔ, mɛ' kerɛ mɔ-asonbo mɔ so de ako, mɔ, mɛ' wɔra mɔ-agyɛbi mɔ anyiilebo.

<sup>12</sup> Genen nsun ndɛ ne Kirisito gi kyu sa aye abono ɔ lɔɔ aye yela sa mɔ-nyoro mɔ. Ɔ sa aye ilaa kpei-kpei idɛ genen daa de ɔ' baala aye sa mɔ-gɛsun mɔ giwɔra de a' nye a kya kpaa

mɔ-asonbo mɔ pɛwu de mɛ' sɛɛ mɔ-ɔson mɔ dɔ. Kirisito asonbo adɛ mɛ dɛ fɛɛ mɔ gbaa-gbaa mɔ-nyoro. Ɔ kya laarɛ a' kyu aye-nsun wɔrase ndɛ kpãa abara

<sup>13</sup> kaabore aye pɛwu a' nye genɔ kolon. Genen genɔ kolon gɛbono gɛ laa lii daa aye-gisoõgyi kolon mɔ dɔ, ne Kirisito, Wurubuaarɛ mɔ-bi mɔ, kya kyu genɔ kolon mɔ sa aye abono a nyi mɔ mɔ. Kirisito kya laarɛ a' kpãa abara kaabore a' ten ansi wɔra fɛɛ mɔ Kirisito-lɛɛ mɔ ɔnan kpãa logɛ.

<sup>14</sup> I ba genen mɔ, a maɲ baa wɔra fɛɛ nbii Wurubuaarɛ ɔson mɔ dɔ. Abonbo mɛ maɲ baa nye kyu ikpa kpei-kpei de adawo kpei-kpei penɛ aye de a' soo mɔmɔ gyi. Mɛ maɲ baa nye penɛ aye fɛɛ genoõbono afuu a kya da nkyu ɔbon so gi kya kpe gi kya ba gɛten kamaase nfono afuu mɔ a kya laarɛ mɔ.

<sup>15</sup> A' kyu daa gɛlaarɛ' kyu tõgɛ Wurubuaarɛ gɛsintin ilaa sa abara. A wɔra genen mɔ, a laa nye sɛɛ wɔra fɛɛ Kirisito-lɛɛ gidebi mɔ ɔkpa kamaase so. Mɔ ne n gyɛ aye-gimu.

<sup>16</sup> Imɔ gɛsɛ ne n gyɛ yɛɛ nyamesɛ nyoro pɛwu gi bo daa gimu mɔ gɛsɛ ne mɔ nkyaga-nkyaga pɛwu gi kya yɛgɛ nyoro mɔ pɛwu gi' kyaga abara dɔ. Nengyene nyoro mɔ gɛten kamaase i bo alanfiya i kya wɔra gesun genen mɔ, nyoro mɔ gi laa sen genoõbono i kaabore mɔ. Genen kee ne i dɛ ne. Kirisito ne n gyɛ aye-gimu mɔ, i kya nyiile yɛɛ aye abono a gyɛ mɔ-asonbo mɔ pɛwu a kya nu daa mɔ asɛ ne a bo abara dɔ. I ba genen mɔ, a laa kyu gɛlaarɛ' a kpe a kya kpãa abara de a' sɛɛ mɔ-ɔson mɔ dɔ.

### *Gekyena Dedaa De Gekyena Pobɔɔ*

<sup>17</sup> Imɔso n yeɛ me-ayaa so n de Wura Yesu ginyen n kya ka mi-i sa fɛye yɛ fɛɲ' baa kii kyena fɛɛ asa abono mɛ mɛɲ kya son Wurubuaare mɔ. Mɔmɔ abono berɛ, mɔmɔ-nwɔnsa giɲ kya kpaa mɔmɔ de mɛ' nu ilaa gɛsɛ.

<sup>18</sup> Wurubuaare ilaa i gye mɔmɔ-gibiri dɔ ilaa. Mɛɲ kya nye Wurubuaare ase gekyena ɔnan. I lii fɛɛ mɛ bo gisoɔlon ne i yege mɛ mɛɲ nyi sei kyu lii Wurubuaare ilaa so.

<sup>19</sup> Mɛ mɛɲ baa mɛ bo ipeeli. Mɛ wɔra mɔmɔ-nyoro fɛɛ idense de inyenyɛn iɲ tiri ɔmɔ, mɛ san mɛ kya wɔra ibono iɲ gye iwɔrase mɔ. Ilaa ibono i kya kyu ineesi bun nyamesɛ mɔ ne n san gyi mɔmɔ-amu.

<sup>20</sup> Fɛye berɛ, i mɛɲ gye mɔmɔ-lɛɛ mɔ ɔnan ne fɛ kase lii Kirisito ase.

<sup>21</sup> N nyi yeɛ fɛ nu Yesu Kirisito so, ne fɛye-rɛ mɔ fɛ wɔra nyamesɛ kolon. N nyi yeɛ mɛ nyiile fɛye gɛsintin ilaa ibono i lii Yesu ase mɔ.

<sup>22</sup> Imɔso fɛ' too fɛye-gidebi dedaa mɔ fue. Genen gidebi dedaa gibono ne n yege fɛ kyena akyenabi nyenyɛn. Ilaa ibono nkana i kya penɛ fɛye ne i kya gyi fɛye-amu mɔ i nyida fɛye genen aberɛ abono dɔ mɔ ne fɛɲ taale wɔra idense.

<sup>23</sup> Fɛ' yege Wurubuaare ɔ' lɔrɔ fɛye-nwɔnsa.

<sup>24</sup> Fɛ' kyu gidebi pobɔɔ gibono Wurubuaare gi sa fɛye mɔ kyu kyena. I lii fɛɛ Wurubuaare gi kii lɛɛ gidebi pobɔɔ sa fɛye fɛɛ mɔ gbaa-gbaa lɛɛ oyuduu. Gɛsintin gigyɪ, ilaa dense giwɔra, de gisen fufuli ilaa wolɛ ne n bo gimɔ gibono dɔ.

### *Gekyena Pobɔɔ Nbara*

25 Imoso feŋ' baa penε abara. Fe' gyi gesintin sa abara. I lii feε aye Yesu asonbo pεwu a gye daa nyamesε kolon feε genɔɔbono nyamesε nyoro nten kpei-kpei gi dabɔle wɔra nyoro kolon mɔ.

26 Nengyene fe sɔɔ ginyadon mɔ, fe men sa fe' wɔra ilaa nyenyen. Feŋ sa fe' yege owi ɔ' tɔrɔ yeε feŋ ti lεε ginyadon gibono lii feye-asen dɔ.

27 Fe men sa fe' bugi ɔkpa feye-gekyena dɔ sa ilaa nyenyen pεwu gemu mɔ de ɔ' nye feye.

28 Ɔbono nkana ɔ gye oyu mɔ, ɔ' taa geyu yege. Ɔ' wɔra gesun kyu nye mɔ-ilaa tirise gesintin ɔkpa so, de ɔ' nye kpaa ayenbo kee.

29 Feŋ sa fe' yege agyebi nyenyen a' lii feye nno dɔ. Fe' tɔge daa agyebi abono a laa lɔrɔ asa ne i tiri amɔ abere tɔgeε dɔ mɔ wolε de i' nye kpaa asa abono me kya nu feye ase mɔ.

30 Wurubuaare Oduduu mɔ gye gisen fufuli wura. Fe men sa fe' wɔra ilaa ibono i laa loo mɔ mɔ. Mɔ-Oduduu baare ne o kyu wɔra feye-asen dɔ de i' daase feye yeε Wurubuaare amɔleε geke mɔ ge fo mɔ, fe laa nye Wurubuaare ase gekyena.

31 Feŋ sa fe' keda abara ginyadon feye-asen dɔ. Feŋ sa fe' sɔɔ ginyadon foro-foro abεε fe' faa abara so abεε fe' saale abara. Gewɔnsa nyenyen kamaase gebono fe sa kyu lii feye-nanboana so mɔ fe' lεε gemɔ lii feye-asen dɔ.

32 Fe' buεεε abara de fe' su abara so. Nengyene fe wɔra abara ilaa nyenyen mɔ, fe' kyu kyεε abara feε genɔɔbono Wurubuaare kee gi kyu feye-ilaa nyenyen kyu kyεε feye kyu naa de feye-re Kirisito ginyamesε kolon so mɔ.



## 5

<sup>1</sup> Fε gye Wurubuaare nbii laarese faa mɔ, fe' kase Wurubuaare ilaa wɔrase.

<sup>2</sup> Fε' kyu gelaare' kyu kyena de abara fεε genɔɔbono Kirisito gi laare aye-ilaa ne o kyu mɔ-nkpa fue sa aye mɔ. O kyu mɔ-nkpa fue sa aye genen mɔ, i wɔra daa fεε o kyu mɔ-nyoro kyu lεε asunbi sa Wurubuaare ne i gyi Wurubuaare ginsi.

### *Fε' Kine Gisomaanu Awura Akyenabi*

<sup>3</sup> Agyibara ilaa abεε ilaa kankaran kpɛi-kpɛi abεε onsipara ilaa in sa i' ba feye dɔ. Ilaa idε ɔnan in kaabore feye abono Wurubuaare gi lɔrɔ yela sa mɔ-nyoro mɔ ba-a pi-i.

<sup>4</sup> In kaabore i' ba feye dɔ yεε fε kya gyi ilaayan nsingyi abεε fε kya tɔge gigyagaa tɔge abεε fε kya gyi abiila kankaran. Fε' taa imɔ ibono ɔnan giwɔra yεge de fe' kpε fε de daa afaala fε kya sa Wurubuaare.

<sup>5</sup> Fε' bii yεε nyamese ɔbono ɔ kya laare agyibara, abεε ɔ kya wɔra ilaa kankaran, abεε ɔ kya wɔra onsipara ɔko ilaa so mɔ, genen asa abono mε maη nye kyena Kirisito mɔ-re Wurubuaare ase mɔmɔ-gewuragyi mɔ dɔ kpa-a. (Onsipara wura bere i wɔra fεε ɔ kya lii Wurubuaare gemara son gesinkpan so ilaa dεnsε).

<sup>6</sup> Fεη sa fe' yεge ɔko o' kyu getonge giyan penε feye. Genen akyenabi adε ne nan yεge Wurubuaare o' kyu ginyadon biide gisomaanu awura giso.

<sup>7</sup> Imɔso fε mεη sa fe' kyu feye-nyoro mada de genen gisomaanu awura abono.

<sup>8</sup> I lii fɛɛ nkana owi ɔko dɔ mɔ, fɛye-asen dɔ i bo gibiri. Idɛ kon berɛ, fɛye-rɛ Wura Yesu ginyamesɛ kolon mɔ so mɔ, fatela kya wu fɛye-asen dɔ. Imɔso fɛ' naa fɛɛ fatela mɔ dɔ asa.

<sup>9</sup> (I lii fɛɛ nfonoana fɛ wu ɔko gi wɔra gidɛnsɛ, abɛɛ ɔ wɔra gisen fufuli ilaa, abɛɛ o gyi gɛsintin mɔ, nno ne fatela mɔ kya wɔra mɔ-gɛsun.)

<sup>10</sup> Fɛ' kerɛ ilaa dɔ de fɛ' lɛɛ daa ilaa ibono i kya gyi Wura Yesu ginsi mɔ wɔra.

<sup>11</sup> Fɛɛ sa fɛ' kyu fɛye-nyoro mada de asa abono mɛ kya wɔra gibiri dɔ ilaa mɔ. Ilaa ibono mɛ kya wɔra mɔ i maɲ wɔra agyan sa mɔmɔ Wurubuaarɛ asɛ. Fɛ' lɛɛ imɔ-gɛwi sa asa.

<sup>12</sup> I lii fɛɛ ilaa ibono mɛ kya wɔra ɲara-dɔ mɔ, ba-a fo ɔko fo kya tɔgɛ imɔ giyan gbaa mɔ, i ti i gyɛ ipeeli ilaa.

<sup>13</sup> Nengyene ilaa nyenyɛn iko i lii gibiri dɔ ba fatela mɔ dɔ mɔ, i kya lii gɛwi.

<sup>14</sup> Fatela ne n kya yɛgɛ asa mɛ' wu ilaa kamaasɛ de ansi. Imɔso ne mɛ da gikpale yɛɛ,

“Fo ɔbono fo dɛ ginsi gidɛ gibiri dɔ mɔ,  
kyingi lii fo-lɛwu ɔbono dɔ.

Kirisito laa sa fo fatela.”

<sup>15</sup> Imɔso fɛ' kerɛ fɛye-anaabi dɔ dandan. Fɛɛ sa fɛ' naa fɛɛ asa abono mɛ mɛɲ nyi ɔlaako mɔ. Fɛ' wɔra fɛye-ilaa fɛɛ asɛɛbo.

<sup>16</sup> Gɛsun kamaasɛ gɛbono fɛ wu yɛɛ fɛ laa taalɛ wɔra sa Wurubuaarɛ mɔ, fɛ' pɛɛrɛ ansi wɔra gɛmɔ. Nkɛ nbono dɔ a bo faa mɔ giɲ boran.

<sup>17</sup> Imɔso fɛɛ sa fɛ' naa giyan fɛɛ fɛ mɛɲ nyi ilaa ibono fɛ kya wɔra mɔ. Fɛ' kasɛ de fɛ' bii ilaa ibono Wura Yesu kya laarɛ fɛ' wɔra mɔ.

18 Fε mεη sa fε' nun nta boo. Fε wɔra genen mɔ, fεη baa nye gεwɔnsa. Ilaa nyenyen gεkyena ne. Fε taa imɔ ibono yεge de fε' yεge Wurubuaare Oduduu mɔ ne ɔ' kyena fεye dɔ.

19 Fε' bii Wurubuaare agyebi dɔ ilon, Wurubuaare asonbo ilon, de Wurubuaare Oduduu mɔ ilon sa abara. Fε' bii ilon sa Wura Yesu de i' wɔra fεye ɔkon lii fεye-asen dɔ.

20 Owi kamaase de ilaa kamaase dɔ mɔ, fε' faala aye-sε Wurubuaare kyu naa de aye-Wura Yesu Kirisito so.

### *Gɛdena Ilaa*

21 Nengyene fε kya buu Kirisito mɔ, fε' bara fεye-nyoro gεse sa abara.

22 Akyii, fε' bara fεye-nyoro gεse sa fεye-kuliana fεε genɔɔbono fε kya bara fεye-nyoro gεse sa Wura Yesu mɔ.

23 I lii fεε ɔnyen ne n gye gimu sa mɔ-ka fεε genɔɔbono Kirisito ne n gye gimu sa mɔ-asonbo gikpen mɔ, ne mɔ-asonbo gikpen kee mε de fεε mɔ-nyoro. Ɔ gye mɔmɔ-gimu ne mɔ kee ne n gye mɔmɔ-ɔmɔlegεbo ɔbono ɔ kya sa mɔmɔ Wurubuaare ase gεkyena.

24 Imɔso fεε genɔɔbono Kirisito asonbo mɔ mε kya bara mɔmɔ-nyoro gεse sa Kirisito mɔ, genen kee ne i kaabore akyii mε' bara mɔmɔ-nyoro gεse sa mɔmɔ-kuliana ilaa kamaase dɔ.

25 Anyen, fε' laare fεye-kaana ilaa fεε genɔɔbono Kirisito gi laare mɔ-asonbo ilaa mɔ ne o kyu mɔ-nkpa fue sa mɔmɔ mɔ.

26 Kirisito gi wu' sa ɔmɔ genen daa de ɔ' nye lɔrɔ ɔmɔ yela sa Wurubuaare. Wurubuaare agyebi mɔ ne o kyu gyere mɔmɔ Wurubuaare

sagyere ne ɔ foro mɔmɔ-ilaa nyenyen fue sa mɔmɔ.

<sup>27</sup> Kirisito gi wɔra ilaa idɛ genen daa de ɔ' nye kyu mɔ-asonbo ba mɔ asɛ de nyisigyɪ. Ɔ kya laare mɛ' wɔra gisen fufuli awura abono ɔ lɔrɔ yela sa mɔ-nyoro. Ineesi de ilaa nyenyen de genen ilaa ibonoana ɔnan pɛwu i maŋ baa nye mɔmɔ dɔ ba-a pi-i faa.

<sup>28</sup> Genen kee ne i kaabore anyen mɛ' laare mɔmɔ-kaana ilaa fɛɛ mɔmɔ gbaa-gbaa nyoro. Fo ɔbono fo kya laare fo-ka mɔ, fo gbaa-gbaa fo-nyoro ne fo kya laare genen.

<sup>29</sup> Nyamesɛ ɔko bo no ɔ kya kyo mɔ-nyoro gibi? Kuaa. Ɔ kya laare agyudɔ sa nmɔ, ne ɔ kya kerɛ nmɔ so dandan. Genen ne Kirisito kya kerɛ mɔ-asonbo gikpen mɔ so ne.

<sup>30</sup> I kya nyiile yɛɛ a dɛ fɛɛ mɔ-nyoro nten kpɛi-kpɛi fɛɛ giyaa, gibaa, de ginsi. Genen ne aye-rɛ mɔ a gyɛ nyamesɛ kolon ne.

<sup>31</sup> Anyen de akyii ginyamesɛ kolon so ne Wurubuaare gi tɔgɛ yɛɛ, “Ɔnyen kya taa mɔ-sɛ de mɔ-nyi yɛgɛ de o' kyu mɔ-nyoro mada de mɔ-ka de mɛ' san bingiri nyamesɛ kolon” mɔ.

<sup>32</sup> Genen gɛdena gigyɛbi gidɛ gi tansi gi gyɛ ilaa boduduusɛ. Nɛ kyu gimɔ wɔra sinkaala de i' nyiile aye ginyamesɛ kolon gibono Kirisito mɔ-rɛ mɔ-asonbo mɛ bo mɔ.

<sup>33</sup> To. Fɛ wolaa fɛ nyi yɛɛ i kya nyiile aye yɛɛ aye ɔkamaasɛ ɔ' laare mɔ-ka ilaa fɛɛ mɔ gbaa-gbaa mɔ-nyoro. Ne ɔkyii mɔ kee ɔ' kerɛ dandan de o' kyu buubuu sa mɔ-kuli.

### *Nbii De Mɔmɔ-Sɛana*

<sup>1</sup> Feye nbii mɔ mɔ, Wura Yesu so mɔ, fɛ' nu feye-sɛana de feye-nyiana aɛɛ. Imɔ ne n boran sa Wura Yesu.

<sup>2</sup> Wurubuaare gi wolaa yela nbara mɔ-agyɛbi mɔ dɔ yɛɛ, “Buu fo-sɛ de fo-nyi.” Nbara ndɛ ne n gyɛ ngyangbarasɛ nbono Wurubuaare gi yela, ne ɔ ka ilaa yela bɔla de nmɔ.

<sup>3</sup> Ɔ ka yela yɛɛ fo ɔbono fo gyi nmɔ so mɔ, fo-ilaa i laa wɔra ɔdan sa fo, ne fo laa kɛɛla gɛsinkpan so.

<sup>4</sup> Feye akorogɛbo mɔ mɔ, fɛɲ sa fɛ' ɲmanyɛn feye-biana. Fɛ' bela mɔmɔ de fɛ' nyiile mɔmɔ ilaa gɛnɔɔbono Wura Yesu kya laare mɔ.

### *Abono Mɛ Kya Son Awura Mɔmɔ-rɛ Mɔmɔ-Wuraana*

<sup>5</sup> Feye abono fɛ tɛ awura aɛɛ mɔ, fɛ' seɛ ɔmɔ de fɛ' nu mɔmɔ-gɛdɛ. Fɛ' kyu gɛsintin wɔra mɔmɔ-ilaa sa ɔmɔ lii feye-asɛn dɔ fitɔfɛɛ Kirisito ne fɛ kya wɔra fɛ kya sa.

<sup>6</sup> Fɛɲ sa fɛ' wɔra asa abono mɛ kya laare ayenbi lii asa aɛɛ mɔ. Feye-wuraana mɔ mɛ yeɛ mɛ kɛrɛ feye-o, mɛ mɛɲ yeɛ mɛ kɛrɛ feye-o, fɛ' wɔra mɔmɔ-gɛlaare sa ɔmɔ kanpɛ. Genen ne Kirisito asonbo mɛ kya wɔra Wurubuaare gɛlaare lii mɔmɔ-asɛn dɔ kee ne.

<sup>7</sup> Fɛ' son feye-awuraana mɔ de ɔkon fɛɛ Wura Yesu ne fɛ kya son, i mɛɲ gyɛ nyamesɛ.

<sup>8</sup> Fɛ' bii yɛɛ fo nyamesɛ fo tɛ owura aɛɛ daa-o, fo tɛ fo-gibaa so daa-o, ilaa dɛnsɛ kamaasɛ ibono fo wɔra mɔ, Wura Yesu laa sa fo imɔ so nteɛla.

<sup>9</sup> Feye abono mɔ, asa mɛ tɛ feye aɛɛ mɛ kya son feye mɔ, feye kee fɛ' nyingi yɛɛ Wura Yesu

ne fe kya son. Fe' taa mɔmɔ gikiide yege. Fe' bii yeɛ obono ɔ gye feye-re ɔmɔ pɛwu wura mɔ bo Wurubuaare dɔ, ne mɔ bere, ɔ men bo geligi.

### *Kyu Wurubuaare Adontɔ Ko De Obonsan*

<sup>10</sup> Me-nanboana Yesu asonbo, pei de me-geɔ ge' yii mɔ, n kya tɔge feye yeɛ fe' yele feye-ayaa so feye-gisɔgyi dɔ. Fe' yege Wura Yesu o' kyu mɔ-ɔlon bele mɔ kpaa feye kyu naa de feye-re mɔ ginyamese kolon mɔ so.

<sup>11</sup> Fe' kyu Wurubuaare adontɔ de mɔ-ilaa kunse mɔ pɛwu kyu baala feye-nyoro yela de fe' nye yele feye-ayaa so owi obono ilaa nyenyen pɛwu gemu mɔ laa kɔ de feye mɔ. Fe' baala yela genen de ɔɲ sa ɔ' nye kyu mɔ golon-golon nwɔnsa kyu gyi feye so.

<sup>12</sup> Genen Wurubuaare adontɔ abono a tiri feye. I kya nyiile yeɛ ikɔ ibono aye Yesu asonbo mɔ a kya kɔ mɔ, i men gye anyamese ne a kya kɔ de. A kya kɔ daa de ilaa nyenyen oduduu ibono i kya nye ɔlon anyamese so mɔ, imɔ-re imɔ-abelense de imɔ-nbii. A kya kɔ de ilaa ibono i kya nye ɔlon gesinkpan so ne i kya bara ilaa nyenyen mɔ. A kya kɔ de akyobo akpen abono a bo afuu so mɔ.

<sup>13</sup> Imɔso fe' kyu Wurubuaare adontɔ de mɔ-ilaa kunse mɔ pɛwu kyu baala feye-nyoro yela de gekaabono geke nyenyen mɔ ge laa ba mɔ, fe' taale yele feye-ayaa so de fe' wɔra ilaa kamaase ibono i tiri mɔ, de fe' kɔ lii.

<sup>14</sup> Imɔso fe' yele feye-ayaa so girin. Fe' kyu gesintin wɔra fee feye-igbagya, de fe' kyu gisen dense fe kya gyi gesintin fa-a sa Wurubuaare de i' wɔra fee feye-nben kuntɔ.

15 Fɛɛ gɛnɔɔbono sogya kya wɔra iko ayaawole mɔ, fɛye kee fɛ' wolaa baala fɛye-nyoro de fɛ' nyɛ lɛɛ Yesu gisen yuuli ɔkalan konkɔnsɛ mɔ tɔgɛ sa asa gɛten kamaasɛ.

16 Imɔ idɛ pɛwu gɛmara mɔ, fɛ' keda fɛye-gikagyan gibono fɛ kya ka gyan Yesu so mɔ dɔ. Fɛye-gikagyan gidɛ gi laa taalɛ duule ɔbonsan, nyamesɛ nyɛnyɛn mɔ akpɛ kamaasɛ abono ɔ kya too fɛye ne a kya dɛɛ fɛɛ ɔgya mɔ. Yesu so gikagyan mɔ gi dɛ fɛɛ ilaa kunɛ ibono sogya dɛ de gibaa ne ɔ kya kyu kun mɔ-nyoro gɛten kamaasɛ mɔ.

17 Fɛ' nyingi gɛnɔɔbono Wurubuaarɛ gi mɔlɛgɛ fɛye lii fɛye-ilaa nyɛnyɛn giwɔra dɔ mɔ. Gɛnɛn amɔlɛgɛ mɔ a dɛ fɛɛ abeletɔ gɛpɛ gɛbono sogyaana mɛ kya kyu kun mɔmɔ-amu mɔ. Fɛ' puru Wurubuaarɛ Oduduu gɛki mɔ keda. Gɛnɛn gɛki mɔ ne n gye Wurubuaarɛ agyɛbi mɔ fɛ laa kyu kɔ iko mɔ.

18 Owi kamaasɛ dɔ mɔ, fɛ' yɛgɛ Wurubuaarɛ Oduduu mɔ ne ɔ' kpaa fɛye de fɛ' nyɛ dalaa de fɛ' kole Wurubuaarɛ ilaa kamaasɛ. Fɛ kya laarɛ fɛ' wɔra gɛnɛn mɔ, fɛ' yɛgɛ fɛye-nwɔnsa gi' gyan Wurubuaarɛ ndalaa so daa so-o. Fɛ' kpɛ keda ndalaa dɔ fɛ kya kole Wurubuaarɛ fɛ kya sa fɛye-nanboana abono Wurubuaarɛ gi lɔrɔ yela sa mɔ-nyoro mɔ pɛwu.

19 Fɛ' dalaa sa me, Pɔɔlo, kee yɛɛ owi kamaasɛ ɔbono nan bugi mɛ-gɛnɔ tɔgɛ Wurubuaarɛ agyɛbi mɔ sa asa mɔ, Wurubuaarɛ ne ɔ' sa me mɔ gbaa-gbaa agyɛbi mɔ. Yesu ɔkalan konkɔnsɛ mɔ gye ilaa boduduusɛ. Wurubuaarɛ ɔ' kpaa me de n' taalɛ da otu lɛɛ mɔ gɛsɛ sa asa.

<sup>20</sup> Wurubuaare gi lee me sun de n' toge Yesu okalan konkonse baare sa asa. Imo ne n yegge Yesu akyobo me keda me tii de obu faa. Imoso fe' dalaa kole Wurubuaare sa me yee n' taale da otu toge Wurubuaare agyebi fee genobono i kaabore n' toge mo. Men sa n' sele sei.

### *Agyebi Laalaaloge*

<sup>21</sup> Ne keda aye-nanbo laarese, Tikakuse sun feye ase. Genobono o kya wora Wura Yesu gesun mo mo, n kya ka gyan mo so. N kya laare fe' nu me so de fe' bii genobono so n de n te de mo. Imoso Tikakuse laa toge me-ilaa pewu sa feye.

<sup>22</sup> Genen so ne ne sun mo faa. I lii fee fe nu me-re me-nanboana so mo, i laa keda feye-nyoro.

<sup>23</sup> Aye-se Wurubuaare de Wura Yesu Kirisito me' sa asa abono me kya son Yesu mo gisen yuuli, gelaare', dabole de gikagyan gibono me laa ka gyan Wurubuaare so mo.

<sup>24</sup> Asa abono me kya laare aye-Wura Yesu Kirisito ilaa ne me man taa genobono me kya laare mo ilaa yegge geakaako mo, Wurubuaare o' sa momo pewu so gewansa dense.



**ḠḠḠ ḠḠḠḠ, ḠḠḠḠ ḠḠḠḠḠḠ ḠḠ ḠḠḠḠ  
ḠḠ-ḠḠ ḠḠḠḠḠḠ ḠḠ ḠḠḠḠ ḠḠ  
The New Testament in the Gikyode language**

copyright © 2020 Wycliffe Bible Translators, Inc.

Language: Gikyode

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 18 Apr 2025 from source files dated 29 Jan 2022

4cc402b4-139a-5f33-9af9-fbf62307f663